

Alþingi
Erindi nr. P 135/1207
komudagur 24.1.2008



FLÓAHREPPUR

Nefndasvið Alþingis
Austurstræti 8-10
150 Reykjavík

Þingborg 24. janúar 2008

Á fundi sveitarstjórnar Flóahrepps 20. desember 2007 var lagt fram erindi frá Menntamálanefnd Alþingis þar sem óskað er umsagna um frumvörp til laga um grunnskóla, leikskóla, framhaldsskóla og menntun og ráðningu kennara og skólastjórnenda fyrir 22. janúar 2008. Sveitarstjórn samþykkti að óska eftir umsögn fræðslunefndar. Einnig var foreldraráði og foreldra- og kennarafélögum Flóaskóla og Krakkaborgar bent á að kynna sér frumvörpin.

Á fundi sveitarstjórnar Flóahrepps 23. janúar 2008 var erindið tekið fyrir aftur. Fenginn var frestur fyrir sveitarstjórn Flóahrepps til að skila umsögnum 24. janúar. Sveitarstjórn þakkaði greinargóða umsögn fræðslunefndar sem liggur fyrir varðandi frumvörpin og tekur undir athugasemdir nefndarinnar.

X Varðandi frumvarp til laga um leikskóla eru gerðar eftirfarandi athugasemdir:
Vegna 5. kafla, 12. greinar:

Hjá sveitarfélögum þar sem húsnæði er ekki samkvæmt reglugerðum, verður að koma skýrt fram bráðabrigðarúrræði í reglugerð, þannig að tekið sé tillit til eldra húsnæðis sem ekki er byggt með starfsemi leikskóla í huga.

Vegna 7. kafla, 17.-19. greina:

Vegna úttekta, gæðamats og eftirlits verður að vera skýrt að sveitarfélög fái fjármagn til að koma til móts við auknar skyldur og ábyrgð sem felast í nýjum verkefnum.

Lýst er yfir ánægju með auknar áherslur á þróunar- og nýbreytnistarf og annað faglegt starf innan leikskóla. Sjóður sem styrkir slík verkefni þarf að vera til staðar hjá ríkinu til að fjármagna slík verkefni.

Einnig er ánægjulegt að sjá að leikskólar séu almennt betur viðurkenndir sem fyrsta skólastig barna og aukinni tengingu við grunnskólana. Samhliða þeirri viðurkenningu þurfa sveitarfélög og fræðsluyfirvöld þeirra að taka við auknum skyldum og ábyrgð. Aukin fjárhagsleg ábyrgð sveitarfélaga vegna nýrra laga er áhyggjuefni og mikilvægt er að sveitarfélög fái aukið fjármagn í málaflokkinn.

Varðandi frumvarp til laga um menntun og ráðningu kennara og skólastjórnenda við leikskóla, grunnskóla og framhaldsskóla eru gerðar eftirfarandi athugasemdir:

Það er ánægjulegt að gerðar séu meiri menntunarkröfur til leik-grunn- og framhaldsskólakennara en veldur um leið áhyggjum ef einhver hættu verður á minnkandi eftirspurn eftir náminu vegna aukinna krafna.

Það er gleðiefni að laun munu væntanlega hækka umtalsvert með auknum menntunarkröfum en um leið þarf aukið fjármagn til sveitarfélaga að vera tryggt svo unnt sé að standa undir þeim kostnaði.

Virðingarfyllst,
f.h. sveitarstjórnar,

Margrét Sigurðardóttir, sveitarstjóri